


八
十



列傳卷第二十一

高麗史一百八

正憲大夫工曹判書集賢殿大提學知
教修

經筵春秋館事兼成均大司成臣鄭麟趾奉



閔宗儒

頓思平

閔宗儒平章事令諡玄孫也年甫十一選為王子始
陽府學友十九調清道監務郡多大姓號難治宗儒
不受請謁繩之以法以最聞秩滿補都兵馬錄事俞
千遇時為都兵馬使見而奇之妻以女未幾籍內侍
忠烈時累遷三司右尹轉判通禮門事拜密直知申
事知典理監察司事進密直副使改銓曹尚書崇福
館使復為密直副使刑曹判書尋罷久之起為典法

判書權授判密直司事監察大夫選授贊成事忠宣
元年以重大匡僉議贊成事判選部事致仕忠肅六
年封福興君八年革異姓封君者宗儒例罷復以贊
成事致仕明年王留元未歸權漢功等怨王欲請立
審王上書中書省聚黨逼百官署名人皆畏勢迎合
或有詭避者有人持紙諷署名宗儒叱曰臣為君隱
直在其中至如欺罔是可忍耶吾雖老不為若賣遂
卻之其人慚而退十一年卒年八十謚忠順天資莊
重美風度明識典故優於吏幹不妄交遊篤於宗族
未嘗干謁公退便杜門謝客洒掃庭堂淨如也性好
馬聞人有良馬必購致之每繫堂下朝夕愛賞晚年

喜絲竹廣植花卉以聲伎自娛子頤叙頤字樂全生
而姿相不凡外王父俞千遇見而奇之曰見他日必
貴姨夫故相金顏聞其言養於家國俗幼必從僧習
句讀有面首者僧俗皆奉之號曰仙郎聚徒或至千
百其風起自新羅頤十歲出就僧舍學性敏悟受書
旋通其義眉宇如畫風儀秀雅見者皆愛之忠烈聞
之召見宮中目為國仙登第補東宮僚屬累轉僉議
注書改秘書郎遷軍簿正郎賜銀緋以版圖正郎兼
世子宮門郎賜金紫忠宣受禪除秘書少尹忠烈復
位隨例免從忠宣在燕邸凡四年後為羅州牧使及
忠宣襲位召為典儀副令改選部議郎知製教陞密

直承旨兼司憲執義尋以平壤尹罷閑居又四年賜
俸祿如舊忠肅即位授選部典書寶文閣提學明年
拜密直副使又為大司憲如元賀正時忠宣在都以
頓舊僚待遇無比後封驪興君忠惠授密直司事進
賢館大提學知春秋館事忠肅後四年卒年六十七
謚文順居第置園林每花時召客置酒賦詩以為樂
好賢愛士待孤寒晚進尤致情禮子思平愉抃渙渙
自有傳

思平字坦夫少有器局政丞金倫號知人以女妻之
學日進試補散員別將不樂武資讀書益力忠肅朝
登第調藝文春秋修撰歷藝文應教成均大司成監

察大夫封驪興君嘗從忠定朝於元及即位以勞拜
僉議叅理賜輸誠秉義協贊功臣號進贊成事商議
會議都監事恭愍八年卒年六十五謚文溫性溫雅
睦親姻善交遊居官處事不為崖異常以詩書自娛
所著及菴集行於世
抃登第忠惠時累遷左司議大夫忠定初拜密直代
言恭愍朝封驪興君辛禍三年卒為人嚴正無私一
循繩矩子霽亮開
霽字仲晦性溫仁清簡不喜華侈好讀書一覽輒記
長於史學恭愍朝年十九登第補國子直學選為春
秋檢閱稍遷典理正即知製教歷成均司藝典校副

令辛禍時官累判典儀事出知春州事有惠政召還
判少府寺事再遷典工禮儀判書辛昌時拜開城尹
商議密直司事恭讓元年除藝文館提學轉僉書密
直司事禮曹判書霽自少以知禮聞故及升樞府常
兼禮曹又惡異端淫祀使工圖僕隸制梃噬犬逐僧
巫狀於壁觀之一日王御經筵謂霽曰聞禮曹定服
色省減佛事然乎對曰服色欲禁異土之物佛事春
秋藏經外當悉罷之王曰不貴異物寔是美德予亦
衣綿布若佛事先王所為予何敢擅罷復拜開城尹
出為漢陽府尹自此以後入
本朝

金之淑

仁沈

金之淑化平府人父鍊美風儀習容止蒞事無斷而
人稱為長者官至叅知政事之淑元宗朝為將軍三
別抄之亂陷賊中無計得脫自投海隨波出沒賊以
小艇追及取之至珍島將斬以狗承化侯溫救解之
使當一面之淑密以賊狀再達于官軍及珍島敗王
嘉其忠義賞以官忠烈朝累遷密直司事以判三司
事如元賀聖節交趾人先入陳庭寔之淑奏曰我國
雖小自太祖奮義之初首先臣服兄弟有盟甥舅有
親願先設幣陳賀帝從之賜坐諸侯王列之淑禮貌
詳閑觀者美之歷僉議叅理同知光政院事叅知機

務尋改評理陞贊成事判監察司事時濶里吉思為
行省平章凡奴婢其父母一良者欲聽為良宰相莫
有正之者之淑謂曰世祖皇帝嘗遣帖帖兀來監國
有趙石奇者訴良帖帖兀欲用上國法事聞世祖詔
從本國舊俗此例具在不可變更濶里吉思不敢復
言加中贊致仕忠宣二年卒年七十三性廉吉剛正
歷仕中外皆有聲績子仁瑾仁沉二女以家貧未嫁
為尼仁沉忠肅朝為護軍時王被讞留元仁沉與慶
斯萬等請王還國潘王曷之黨惡之囚巡軍後拜知
申事尋除密直副使又加贊成事王薨與征東省負
外韓帖木兒不花前即將盧英瑞等如元請忠惠襲

位及元囚忠惠於刑部乃與金倫等繫于獄忠惠還
國錄功為一等封光山君忠穆為元子在元以師傳
朴仁幹卒手書招仁沉及府院君金永昶咸陽君朴
忠佐等入侍宰樞不許故未赴恭愍即位追念侍從
功贈謚錄子子元孫命續命自有傳

鄭僖

鄭僖字去非初名賢佐草溪人弘文公倍傑七世孫
也元宗末擢魁科調全州司錄忠烈朝累遷吏兵二
部總郎歷宰三州皆有聲績後為右常侍知內旨王
以僖正直命管齋醮都監忠宣時以僉議評理致仕
屏浮華日以閱釋典持戒為事卒年七十五子光祖

光緒光度光祖子珣珣字孟淳官至判開城封八川
君為人精曉音律且以知禮聞後進皆就學焉謚良
獻

李琨

李琨字去華一字太初全義縣人元宗朝年十七登
第調廣州叅軍入補國學學正忠烈時累歷僉議舍
人右副丞旨陞副知密直司事文翰學士承旨加同
知司事王嘗欲籍耽羅氏戶隸內庫琨極言不可王
不悅時近幸多奉使擾民都堂言西北界人性暴悍
不可以內旨擾之自今宜下都評議司司牒都指揮
使亦可辦事驛吏逃散實由傳遞之繁宜遣使整理

近以內旨出使者相繼民受其弊宜經都評議司給
驛然後行近幸者疾之訴于王王怒命巡馬官執堂
吏李紆訊其倡議者紆曰此事皆我所為王益怒命
萬戶高宗秀必欲得情痛加榜掠紆誣服指琨下琨
獄遂罷起知密直司事世子元賓陞密直司使銓曹
判書集賢殿大學士修國史尋罷復起判密直司事
又罷王謂左右曰人臣之節斬不如舊昔李混尹珣
主銓選寡人欲以混弟子和為行首混辭曰殿下不
以臣為不肖待罪銓曹臣弟為行首則人謂臣何又
以珣子安庇為權務珣亦曰臣子年少臣又掌銓選
不敢受皆固辭再三今之主銓選者先以美官授親

戚不令寡人知之况敢辭乎此所以廉耻日喪世道日降也王惟紹宋邦英既誅忠宣得專國政以混為僉議侍郎贊成事俄改中護忠宣在元以賀正使召之至則與議選法更定官制於是察直重房內侍三官五軍皆罷失職者多怨之混與崔鈞金元具權準賈忠宣所定官制及批判還自元時宰樞會慈雲寺有人投慝名書云中護李混詣瀋陽王所議選法陞擢二子其餘所舉多親戚故舊誣上行私不宜任用混大慚及忠宣還國事皆令藝文館申奏故拜混大詞伯加壁上三韓未幾為淑妃所構貶淮州牧使又貶禮州牧使召還拜僉議政丞致仕混性寬厚嘗與

鄭璿尹瑤在政房相推致一日語曰吾輩交歡久盍相告以過混謂琨曰人謂君巧又謂瑤曰人謂君好自尊宜改之璿乃謂混曰人謂君不廉然乎混以典銓選性且不廉故其家富務疏散喜賓客好琴碁置別業于城南號曰福山莊數往來卒年六十一謚文莊詩文清便長短句若干篇行于世嘗貶寧海得海浮查制為舞鼓至今傳于樂府子異少穎悟登第仕至成均樂正先卒無子

崔誠之

文度

崔誠之字純夫允五易名阜璿瑋實誠之平章事甫淳四世孫也父毗一官至贊成事誠之未弱冠登第

管記雞林入補史翰選為春官屬從忠宣如元執政
畏惡忠宣百計誘之使去誠之笑曰窮達在天休於
利非士也忠宣定內亂擁立武宗誠之居左右多所
贊襄拜知監察司事奉策命還國忠烈喜賜衣一襲
銀三斤及忠烈薨忠宣自元奔喪率百官肆即位儀
賜誠之鞶帶常與權漢功等召見無時及葬慶陵誠
之時為執義舊例中丞署名封玄宮俗傳封陵者不
吉是日執義李彥冲辭王命誠之押封且曰前程不
在我乎驟遷同知密直司事大司憲轉僉議評理進
贊成事賜推誠亮節功臣號封光陽君忠肅七年元
流忠宣于吐蕃撒思結之地去京師萬五千里時誠

之從忠宣在元逃匿不見唯直寶文閣朴仁幹大護
軍張元祉等十八人從至流所時人以為誠之大臣
也至辱忘恩全身逃避君臣之義掃地矣時國人分
黨相訐朝廷議立省比內地誠之與金廷美李齊賢
等獻書都省陳說利害其議遂寢潘王嵩黨疏國家
得失將言于朝廷誠之不肯署名主謀者同坐府中
令錄事請署誠之屬聲曰吾嘗備位宰相僉錄欲相
費耶衆沮喪十一年上書乞退以光陽君家居畜聲
妓召賓客清談雅笑不問人間事居七年卒年六十
六謚文簡官元葬事性剛直不妄語書法楷正詩醜
籍可喜尤邃陰陽推步法忠宣留元見太史院精曆

數賜誠之內帑金百斤求師受業盡得授時曆術東
還遂傳其學至今遵用之子文度字義民以世家子
宿衛元朝樂觀濂洛性理之書事親孝性溫良人未
嘗見其卒怒而遽喜官至僉議叅理謚良教子思儉

蔡洪哲

蔡洪哲字無悶平康縣人忠烈朝登第補膺善府錄
事稍遷通禮門祇候出守長興府有惠政已而棄官
閑居凡十四年自號中菴居士以浮屠禪音琴書劑
和為日用忠宣素知其名及即位將大用強起之除
司醫副正驟陞密直副使由前祇候入遷為相士林
榮之又加知司事忠肅元年始正經界量田制賦洪

哲為五道巡訪計定使明年陞僉議評理轉三司使
尋遷贊成事巡訪一年五道田籍粗畢然新舊貢賦
多不均民不聊生性又貪婪喜營私多取民田遂致
鉅富王維不直其所為以有寵忠宣且與權漢功崔
誠之善故未敢發至五年欲釐正之分遣臺官竟無
糾舉者七年拜重大匡平康君子河中仕元秩五品
以恩授洪哲奉議大夫大常禮儀院判官驍騎尉大
興縣子忠肅復位起為贊成事時兩府以行邸用度
不足科歛文武官布抽索富人財理問郎中蔣伯祥
謂洪哲曰君為老相強歛民財何也洪哲曰非吾過
也今王在燕邸多所需用有旨徵錢府藏虛竭不能

支用不歛何為改封順天君進三重大匡賜純誠輔
翊贊化功臣魏命洪哲及安珪掌試梁載者王之嬖
幸也操弄政柄士大夫多出其門載以李潤屬洪哲
曰走馬看錦恐迷日五色洪哲果取之王賜洪哲學
布五十疋珪玉帶五綜布六百疋忠惠後元年卒年
七十九為人精巧於文章技藝皆盡其能尤好釋教
嘗於第北構梅檀園常養禪僧又施藥國人多賴之
呼為活人堂忠宣嘗幸其園施白金三十斤又於第
南作堂號中和時邀永嘉君權溥以下國老八人為
耆英會製紫霞洞新曲令樂府有譜初金方慶鎮北
界悅龍岡官婢生一女洪哲娶之生河中河老河中

別傳

金怡

金怡字悅心一字隱之福州春陽縣人初名之琰後
改廷美忠宣王賜名怡初母夢天爛赤日輪帶赤暈
入懷中因有身怡生而貌魁梧早有大志安珪嘗見
之曰後當貴年十餘為都評議司掾吏事雖鄙不憚
識者異之忠烈十四年怡年二十四偶宿華藏寺夢
王御正殿郡臣擁衛祥雲掩苒王唱一句云青雲紫
氣知仙閣怡賡云綠髮清談是貴人王嘉嘆解衣衣
之以此預知貴顯之兆是年調長興府倅十六年哈
丹入寇國家令州縣據險自保禁民出耕令出咸懼

怡謂按廉姜就曰天兵制此小醜如几上肉耳何能
到邊郡且食為民天耕種有時時不可失請出耕就
曰如違令被譴何怡退而嘆曰一夫不耕天下受飢
從今不耕則餓死者衆不從而耕則受罪者衆也令
民出耕賊果至燕岐而滅他郡皆未獲唯此府大熟
遠近賴之十八年秩滿召入內侍忠宣受禪尋遜位
以前王在元見譖于王資用不繼欲賣寶帶怡曰世
寶不可輕鬻遂貸錢以供頓三十年柳清臣朴景亮
等欲壽國柄誑忠宣言本國都僉議使司世祖皇帝
已陞為二品且賜印以寵之今其官亦受帝命除拜
之與朝廷為一朝廷大臣不敢凌蔑是國家萬全之

策忠宣深然之將表聞大寧君崔有滄密語怡曰若
從二人言東國之業已矣政令自中國出幾何不為
其所弁也怡乘間具陳忠宣乃止後王與忠宣俱在
元王聽群小譖欲廢忠宣以瑞興侯瑛為子又以忠
宣公主改嫁瑀兩王之臣角立相傾怡懼禍將起密
取忠宣受封詔冊潛帶腰間以他紙納忠宣匣中緘
封如故居數日宣匣果為人所竊忠宣大驚怡密言
曰臣恐不虞之憂嘗取匣中書藏之請勿驚月餘群
小計垂成怡出所佩冊命以驗之事遂寢累遷版圖
正節三十四年王薨忠宣復位還國初忠宣在元資
用欲乏衆議以為就富豪借錢令本國償之怡曰本

國素無蓄積近因父王赴都府藏罄盡且歛民間公私俱匱今官自稱貸而欲令民償之如小民何從之授民部議郎試內府令兼繕工副令都津長充開城少尹兼豐儲廣興倉義盈庫濟用司事凡錢穀出納皆委怡元年轉司憲執義陞右副承旨明年進密直副使五年王在元杖流金深李思溫于臨洮疑怡黨於深等使贊成事權漢功等來鞠怡及其子護軍文貴于巡軍貶怡為機張監務流文貴于合浦籍其家忠肅受禪拜同知密直司事轉參議評理賜翰誠保節功臣號懿妃薨于元喪具未備怡燒骨納函棺身自瘞之每當朔望備羊酒親奠終三年後王欲仍寔

大都西山怡以百計止之不得貸術士以詭辭諭王曰安厝本國無後禍王從之還葬衍陵五年王遣司憲持平張元組于西北面問民疾苦元組才劣未有發摘獨舉怡橫歛皮幣事忠宣聞之以怡方扈從流元組引月島七年加贊成事慶山君八年以連摧漢功蔡洪哲等繫于巡軍尋釋之時柳清臣吳潛等謀立瀋王高會英宗崩泰定帝登極清臣等未遂其謀又請立行省罷國號帝然之遣平章政事闊克察中書怯烈等于本國忠宣還自吐蕃聞之對怡歎曰我祖統三為一立高麗號于今四百有餘年我忠憲王首先歸順忠教王親朝釣魚山又謁世祖皇帝于

汴梁蒙賜玉帶父忠烈王為附馬世承帝眷為天下
諸國榮觀何不幸及我以二三奸臣之謀遂墜我祖
業乎祖宗何辜不復血食因泣下謂怡曰復高麗號
卿有之昔皇慶初叛臣之裔洪重喜等訴于帝立行
省削國號卿歷奏祖宗臣服之功奉帝旨遂罷行省
今又宜盡力圖之怡乃與崔誠之李齊賢等上書都
堂為陳利害都堂從之復拜贊成事十三年陞僉議
政丞明年改中贊加賜推忠保節同德功臣號圖形
功臣堂賜田及減獲卒年六十三謚匡定性豁達有
長者風久從忠宣有負綬之勞終始一節子文貴忠
惠初以密直使掌銓注止護軍朴連白王曰近日銓

注不公王命收還批判果有改注者乃杖流文貴于
加羅山防禦所

李仁琪

李仁琪雞林人性寬厚美風儀習禮度以武勇顯為
護軍疾重房諸將怙勢使氣抗辱之諸將訴忠宣忠
宣雖直仁琪以諸將皆土國婦寺黨不得已削仁琪
職未幾起授知諫部事俄遷判中門事忠肅三年卒

洪彬

洪彬字文野南陽人其先世居燕彬宿衛內庭積其
勞以長官薦授大都路霸州同知歷松江府判官都
水監經歷大常禮儀院經歷忠肅被譖留元彬為王

出死力訟其屈而別白之及王復位東還彬從之王
念彬功將留之奏授征東省理問所官拜都僉議贊
成事判軍簿事忠肅薨遺命彬推征東省事時曹頓
作亂率彬及省官等襲忠惠宮頓敗死餘黨皆繫巡
軍獨宥彬及省官元聽頓黨訴遣使執忠惠及彬等
以歸囚王于刑部又械彬等于獄使中書省樞密院
御史臺宗正府翰林院雜訊之忠惠不能自明事殆
矣彬曰頓王之奴奴而欲戕其主王法所不赦王罪
當從末減彬以先王遺命推行省事事干邦憲者彬
實當之王不當坐辭氣慷慨人皆為彬危之彬曰吾
王之子吾不直之何以見先王地下乎王復位策勳

為一等封唐城君開府仍奏彬為行省郎中王被執
如元彬與德城君奇輒推征東省與輒蔡河中等封
內帑初代言印璫自元將封內帑急馳駟來駟騎至
斃彬謂璫曰君之來國人皆謂復正三韓今但封府
庫耶奮袂而出自後托疾不肯視事忠穆嗣位有許
政者中原人也誣彬以為印璫奉王命來彬舉手佛
然曰皇帝使八歲童蒞國國之安危可知因辭去二
日不朝引蔡河中為證事聞中書省遣人來鞠之二
人言卒抵牾及抵罪彬曰我不可久于此遂如元為
興國路總管後還國恭愍即位拜右政丞賜推誠翊
戴同德協義輔理功臣號封唐城府院君與洪彥博

李公遂提調政房頃之辭職王遣內人起之彬杜門不出宰樞會其家請之乃出尋又辭卒年六十六謚康敬子壽山仕至通禮門副使

曹益清

曹益清昌寧人忠肅朝中郎將忠惠襲位在元政丞鄭方吉等交構王父子時益清自忠惠所來忠肅召謂曰王奪我從臣職何也雖潘王曷為王豈至如此吾欲如元奏帝何如益清力陳父子相傳之法言甚切至忠肅嘉納之累遷大護軍與代言尹桓謀去忠惠所狎惡少輩執宗八郎洪莊等囚之拷掠甚峻洪莊欲釋憾譖益清貶為濟州安撫使後與李云哥輒

等在元上書中書省極言忠惠貪淫不道請立省以安百姓忠定時拜贊成事恭愍初益清家奴買宣城達魯花赤魯連祥馬及連祥叛諸相議欲起兵捕之益清獨不可曰一騎可呼何必起兵有人譖云益清受連祥馬監察使杖其奴鞠之奴不承監察司又挾益清淫祀請罪之王不允後拜左政丞封夏城府院君賜純誠直節同德贊化功臣號二年卒謚襄平辛禍二年配享恭愍廟庭

裴廷芝

裴廷芝字瑞漢初名公允大丘縣人甫十歲屬禁衛為都知元宗十一年遷都舊京廷芝年十一負綬扈

從以功補隊正忠烈時以別將從萬戶印侯擊哈丹于燕波拔劍躍馬所向披靡流矢貫輔車裘瘡復戰俘馘甚衆超授中郎將侯携以如元帝召見曰勇士也賜白金五十兩後兩府舉以為忠清全羅兩道察訪挫奸猾撫孤獨一境安集忠宣受禪授護軍王謂富國莫先于農設典農司有備倉以廷芝幹其事忠肅五年耽羅賊魁金成等叛以廷芝為存撫討使之既還授密直副使八年黨獄起杖流竹林防護其子天慶請以身代不聽遂俱竄及還閉門謝病日以琴碁自娛明年卒年六十四為人于思而端體貌魁梧人皆服武畧不知有吏能口不言利家無十金子成

慶天慶咸慶

孫守卿

孫守卿家世卑微忠肅時為大護軍忠勇被徵如元守卿侍從有勞錄功為一等爵其父母妻子賜田及臧獲忠穆即位拜僉議叅理進贊成事忠穆薨忠定如元及即位封義昌君屢召守卿謝病不就遂封推誠宣力翊戴定遠功臣判三司事義昌府院君尋拜都僉議政丞本國嘗受帝命使臣奉詔來則王出迎餘則否丑駙奉御香來申德隣安吉祥等畏威使王出迎守卿為相不能舉正有僧因訟奴婢辱丑駙亡匿丑駙怒取守卿辭一日丑駙道過守卿以館穀之

薄欲鞭之守卿走馬以免憲司初以冢宰被辱時人
訊之恭愍朝釋器之獄起守卿以辭連逮獄尋斬之

列傳卷第二十一

列傳卷第二十二

高麗史一百九

正憲大夫工曹判書集賢殿大提學
知經筵春秋館事兼成均大司成臣鄭麟趾奉
教修

朴全之

朴全之竹州人也父暉官至典法判書全之年未弱
冠登第歷史翰忠烈五年元世祖詔選衣冠子弟入
侍全之與焉因留元與中原名士遊商確古今山川
風土如指諸掌王重之元授征東省都事既還除吏
兵二部侍郎以年少官高上章辭出守安東王愛其
才召拜殿中尹知製教時忠宣為世子命令侍講多
所輔導又從世子如元不憚艱險及世子受禪置詞

林院以全之崔昱吳漢卿李瑱為學士掌銓注命全之等撰即位教賜綾絹紬苧布各十五匹尚乘鞍馬後又賜全之漢卿瑱權承紅鞞王常屏左右幸詞林院與全之等謀議政理手賜酒食後容盡日或至夜亦賜宮燭送至其家寵幸無比尋拜三司左使詞林學士承旨選密直副使為中京留守忠烈復位以譖見罷忠宣復位以東宮舊僚封延興君忠肅八年守僉議贊成事致仕時潘王之黨誣王以罪上書都省逼全之署名全之奮然曰狗奴敢污我耶遂書其子瑗聞于王所及王還國拜瑗右副代言任銓選起全之視事以老固辭乃授政丞致仕賜推誠贊化功臣

號俸祿如故十二年卒年七十六謚文匡為人溫和慈愛遇事少剛果幼在襁褓外王父李藏用見之曰此兒必克家好養之及長通經史究術數誨人不倦與人交不立崖岸藏用盡傳其家所寶書籍忠宣嘗召入內廣平江陵二君侍王令各自書名以示曰誰享國者全之不敢對王固要之良久避席曰觀兩君筆蹟亞君當璧矣不數月廣平卒江陵果為嗣其識見如此子初名瑗登第仕至政堂文學有寵忠肅久典政柄性仁柔頗有簠簋之誚

吳訥

吳訥初名漢卿字月叟海州人元宗初中監試第一

選為東宮侍學登第調南京司錄轉中書注書忠烈朝由僉議舍人出守金寧府考滿拜軍簿提郎除書未到詞以為秩已滿不可留遂行無何按廉劉顯在金寧為賊所刺闔府被鞠詞獨免官累左司議大夫詞林院學士殘歷華要至僉議贊成事監春秋館事知選部事仍令致仕忠肅元年卒年七十三謚文溫學問精博在朝歲無著績然寬簡無華知大體有長者風子璿璿璿

李瑱

李瑱字溫古初名方衍慶州人三韓功臣金書之後少好學博通百家有能詩聲人或試以強韻援筆輒

賦若宿構然尚書李松縉一見奇之曰大器也登第調廣州司錄被選直翰林院忠烈以詩賦親試文臣得九人瑱居第二歷起居中書舍人出為安東府使以祛民弊興學校為務累轉軍簿總郎陞右司議大夫詞林院學士俄遷大司成密直承旨改典法判書忠宣奉仁宗靖內難草本國積弊瑱上書畧曰殿下樹勳帝室賸遇日隆誠宜有功不伐居寵若驚又與朝臣和如水乳且名器至重無功之人不可妄授况及族黨乎其詐稱父王之賜竊府庫錢穀者人皆疾之不可不察其賜給土田除有功外一切收之官冗負多糜費廩祿除六部尚書外餘悉并省比年旱荒

民皆艱食宜罷不急之後王嘉納起拜政堂文學商
議都僉議司事進贊成事忠肅即位拜檢校政丞臨
海君七年子齊賢掌試領門生稱壽忠宣賜銀瓶二
百米五百石以供其費瑱及妻皆康強無恙當世榮
之瑱嘗倚齊賢勢多奪人臧獲哀訴者日踵門校勘
崔沔益于瑱門辨違都監決還沔家八年卒年七十
八謚文定為人體貌魁梧局量寬洪然在廟堂無所
建白及解官居閑日與儒釋逍遙詩酒間子宿齊賢
之正齊賢自有傳

尹莘傑 朴孝修

尹莘傑字伊之慶州杞溪縣人忠烈朝登第調南京

司錄時博士只占一經多非其人嚴其選必通五經
然後為之莘傑被薦為四門大學博士忠宣即位授
右獻納江陵府翊善使傅忠肅後忠宣惡莘傑有罷
于忠肅貶知寧海府尋除選部議郎及忠肅立拜右
副代言寶文閣提學知製教進密直副使選部曲言
累遷知密直司事陞議文大提學賜純誠輔理功臣
號以事忤王王杖辱之忠宣命莘傑李齊賢為試官
莘傑以選部曲政柄干請州郡聚錢財欲設學士宴
疑其貳于己即罷莘傑以朴孝修代之官至僉議評
理封杞城君卒年七十二謚莊明無子為人嚴重訥
言歷仕兩朝久典遷選不以私輕重之時稱長者孝

修素有清操累官至代言及代莘傑取士王嘉其清
白賜銀瓶五十米百石令辦學士宴孝修清節益著
後封延昌君卒

許有全

許有全初名安金海人元末登第忠烈時為監察
侍史王信嬖幸之譖因巡馬所將杖于市無敢救者
巡馬指諭高宗秀得幸出入卧内白王曰監察為王
耳目彈糾百官今以小人之譖而杖之人謂上為何
如主再三譬解乃得免遷國學司藝銓曹侍郎累轉
都僉議叅理知密直司事忠肅初封駕洛君賜端誠
守節功臣號加守僉議贊成事致仕拜政丞復封駕

洛君忠宣流吐蕃有全與閔漬等如元請召還有全
時年八十一妻亦老病欲止之答曰人皆有一死豈
以妻病身老忘吾君而自逸乎屬其子榮侍疾遂永
訣而去聞者歎之後九日妻歿有全至元留半歲為
瀆王黨所沮竟不能達而還

朴忠佐

朴忠佐字子華咸陽人祖之彬衛尉尹生四子皆登
第長曰莊仕至軍簿總郎生忠佐自幼嗜學登
第忠肅朝按全羅嬖人朴連傳內旨認良民為隸忠
佐執不許連譖曰按庶不敬王旨棄如敝紙王怒杖
流海島召還授監察掾平移病不出改藝文應教命

監慶尚益稅又不就尋遷內書舍人累轉密直提學
開城尹忠穆時拜贊成事入侍書筵講貞觀政要因
言燕昭王築黃金臺迎郭隗事賜鈔五十錠尋判三
司事賜純誠輔德協贊功臣號封咸陽府院君忠定
元年卒年六十三性溫厚儉約雖為卿相居室衣服
如布衣時好讀易老不輟子珪珣瓊瑤瑱

尹宣佐

尹宣佐字淳叟侍中瓘七世孫生而穎異七歲能屬
文忠烈朝擢魁科由金海掌書記入補秘書郎直文
朝署忠宣初授左正言再轉右思補累遷內書舍人
選部議郎按全羅道以剛直聞陞都津令忠肅素聞

其名及即位授成均祭酒命掌符印在左右轉監察
執義與尹莘傑白元恒進講資治通鑑尋以事罷復
授執義時潘王嵩得幸英宗誣王以罪欲奪其位患
得之徒皆附焉樵漢功蔡洪哲等邀驪興君閔漬永
陽君趙珣等欲請立嵩會百官慈雲寺督署呈省書
人爭趨之宣佐獨曰吾不知吾君之非臣而訴君狗
彘不為唾之而去由是臺諫文翰不得署名事定中
書以其書歸之王數其不署者而歎曰非宣佐在憲
司則其他未可知也時王留元五年財用匱乏嵩黨
知其然封府庫以沮輸運宣佐檄察官趙瑄督責主
者輸運乃行王歸國除判典校俄以民部典書出尹

漢陽既而王及公主如龍山謂左右曰尹尹清儉故使牧民汝曹慎勿擾溷忠惠元年引年致仕忠肅後四年親注守令至雞林尹輟筆思曰朝臣盈廷無如尹尹即注之其見信於王類此明年拜僉議評理藝文館大提學監春秋館事仍令致仕忠惠後四年得微疾呼子女而前曰今之兄弟多不相能者由有爭也命子聚書文契均分家業且戒之曰和而無爭以訓汝子孫言畢整衣冠而卒年七十九生平不治產性不嗜酒未嘗戲詭歌舞慎文遊重然諾閑居常若待賓唯以經史自娛有質疑者輒據經以對老莊刑名之書靡不研窮故學者多歸之詞翰清便一時表

箋多出其手子棟聚廕

李兆年

承慶

李兆年字元老京山府人父長庚本府吏恭儉有威鄉人嚴憚之老而家居府官出入聞喝道聲必下床伏地俟其聲不聞然後復坐兆年少懷志節有器局力學能文年未冠神彩秀發草溪鄭允宜使其府一見知為異人以其子妻之忠烈二十年以鄉貢進士登第調安南書記累轉為禮賓內給士出知陝州入為秘書郎三十二年從王朝元王維紹宗邦英離間王父子諸從臣皆懷疑縮縮走匿曹頤最先去惟兆年恃無他進退惟謹例遠竄歸而居鄉者十三年未

嘗一出言訟其非罪忠肅見留於元五年潘王屬內
懷覬覦左右多反覆兆年發憤獨如元獻書中書省
訟王之直朝廷美之忠肅國還授監察掌令轉典理
總郎存撫關東召拜判典校事加軍簿判書忠惠王
以世子入朝丞相燕帖木兒見之大悅視猶子因忠
肅辭位奏帝錫王命時太保伯顏惡燕帖木兒專權
待忠惠不禮忠肅復位忠惠宿衛於元時燕帖木兒
已死伯顏待忠惠益薄忠惠與燕帖木兒子弟及回
骨少年輩飲酒為謔因愛一回骨女或不上宿衛伯
顏益惡之目曰撥皮俗謂豪俠者為撥皮從臣皆缺
望不敢言兆年進戒曰殿下事天子宜曰慎一日何

乃棄禮縱情以速累乎然此非殿下之過殿下長於
阿保之家所共遊者多無賴子其後朴仲仁李仁吉
實左右之殿下孰從而聞正言見正事者乎儒者雖
朴拙皆能習經史識廉耻殿下目之為沙箇里此何
等語耶殿下能遠接倖親儒雅改行自飭則可不然
天威咫尺其嚴乎王不能堪其言踰墉而走曹頓之
亂忠惠被徵至燕兆年從之伯顏蓄宿憾使王與頓
黨辨兆年慷慨發憤謂李齊賢曰吾欲面訴丞相前
其意可回列戟守門莫叫其闖幸其出田城南吾當
上書道左碎首馬蹄下死明吾君吾子其把筆書吾
書夜起沐浴雞鳴將行伯顏適以是日敗書不果上

然聞者莫不悚然曰膽大於身李公是已忠惠襲位
還國錄功當得樞密王曰兆年老矣其志可嘉乃授
政堂文學藝文大提學封星山君王嘗步自北宮彈
崔於松岡兆年往進跪曰殿下寧忘明夷之時乎今
惡少假威畧婦女攘財貨民不樂其生臣恐禍在朝
夕此而不恤顧玩細娛乎殿下聽老臣言去便倭用
賢良勵精圖治不復慢遊則老臣雖死瞑目于地下
矣初商人林信女丹陽大君之婢也賣沙器為業王
見而幸之有寵授信大護軍一日信啟奇輪王右信
親往毀輪家至是并諫之且曰臣過蒙國恩位至政
堂於臣足矣惟上所裁王盛怒不納既而溫言謝遣

之兆年既歸第歎曰王年方強而肆欲吾既老矣又
無助不去必及于禍且數諫而不納責有所歸今兆
年既不能順其美適足以增其惡非臣所以愛主也
不如去明日匹馬還鄉不交人間事後兆年弟延慶
見王王曰爾兄辱我延慶以耄狂對王喜賜米豆五
十石布五百疋三年集侍從功為一等賜誠勤翊贊
劬節功臣號圖形壁上爵其父母妻子賜田及臧獲
明年卒年七十五謚文烈為人短小精悍志堅確敢
言以嚴見憚每入諫王聞履聲曰兆年來矣屏左右
整容以俟所歷多有聲績恭愍朝議功贈星山侯配
享忠惠王廟庭子褒官至檢校侍中性淳厚循循蹈

禮褒子仁復仁任仁美仁立仁達仁敏仁復仁任自
有傳仁美判書仁立同知察直司事仁達注簿仁敏
門下評理兆年姪承慶

承慶蒙古名帖木不花入仕元朝歷御史廉訪諸路
以能斷決聞累叅遼陽省叅政恭愍六年奔母喪東
還明年元遣遼陽省事塔海帖木兒召之承慶不赴
王拜為門下侍郎平章事八年紅賊陷遼都元帥李
亞儒不能軍遣承慶代之督諸軍九年承慶在生陽
驛以諸將不盡力擊賊憤惋不食遂得疾還家不視
事王對諸宰相稱賞承慶忠義不置賜忠勤劬節協
謀威遠功臣號尋卒

李穀

李穀字中父初名芸白韓山郡吏自成子也自齠齷
舉止異常稍長知讀書疊疊忘倦早喪父事母孝為
都評議使司掾吏忠肅四年中舉子科研窮經史一
時學者多就正焉七年登登調福州司錄叅軍忠惠
元年遷藝文檢閱忠肅後元年中征東省鄉試第一
名遂擢制科前此本國人雖中制科率居下列穀所
對策大為讀卷官所賞置第二甲宰相奏授翰林國
史院檢閱官穀與中朝文士交游講劇所造益深為
文章搢筆立成辭嚴義奧典雅高古不敢以外國人
視也奉興學詔還國尋復如元本國授典儀副令元授

徽政院管勾轉征東省行中書省左右司員外郎元
屢求童女於本國教言於御史臺請罷之代作疏曰
古之聖王其治天下也一視而同仁雖人力所至文
軌必同而其風土所宜人情所尚則不必變之以為
四方荒徼風俗各異苟使同之中國則情不順而勢
不行也勢不行情不順而善治之雖堯舜不能矣昔
我世祖皇帝臨御天下務得人心尤於遠方殊族隨
其習而順治之故普天率土歡欣鼓舞重譯來王猶
恐或後堯舜之治蔑以加也高麗本在海外別作一
國苟非中國有聖人邈然不與相通以唐太宗之威
德再舉伐之無功而還國朝肇興首先臣服著勲王

室世祖皇帝登降公主仍賜詔書獎諭曰衣冠典禮
無墜祖風故其俗至於今不變方今天下有君臣有
民社惟三韓而已為高麗計者當欽承明詔率祖攸
行修明政教朝聘以時與國咸休可也而乃使其婦
寺之流根據中國實繁有徒怙恩恃寵反撓本國至
有冒干內旨爭馳傳遽歲取童女絡繹輦來夫其取
人之女以媚於上為己之利雖高麗自取之也既稱
有旨豈不為國朝之累乎古昔帝王發一號施一令
天下顛顛望其德澤故稱詔旨曰德音今屢降特旨
奪人室女甚為不可夫人之生子鞠之育之將以望
其反哺也無尊卑之別華夷之間其為天性一也抑

彼風俗寧使男異居女則不出若為秦之贅婿然凡
致養於父母者有女之尸焉故其生女也思斯勒斯
日夜望其長能有以奉養而一朝奪之懷抱之中送
之四千里外足一出門終身不返其為情何如也今
高麗婦女在后妃之列配王侯之貴而公卿大臣多
出於高麗外甥者此其本國王族及閥閱豪富之家
特蒙詔旨或情願自來且有媒娉之理焉固非常事
而好利者援以為例凡今使其國者皆欲妻妾非但
取童女而已夫使于四方將以宣布上恩詢咨民隱
詩不云乎周爰咨詢周爰咨諏今乃使于外國貨色
是黷不可不禁也側聞高麗之人生女者即秘之惟

慮不密雖比鄰不得見每有使臣至卑國便失色相
顧曰胡為乎來哉非取童女者耶非取妻妾者耶已
而軍吏四出家搜戶捫若或匿之則繫累其里鄰縛
束其親族鞭撻困苦見而後已一遇使臣國中騷然
雖雞犬不得寧焉及其聚而選之妍醜不同或啖其
使臣而飽其欲雖美而舍之舍之而他求每取一女
閱數百家惟使臣之為聽莫敢或違何者稱有旨也
如此者歲再焉或一焉間歲焉其數多者至四五十
既在其選則父母宗族相聚哭泣日夜聲不絕及送
於國門牽衣頓仆攔道呼號悲痛憤懣有投井而死
者有自縊者有憂愁絕倒者有血泣喪明者如此之

類不可殫記其取為妻妾者雖不若此逆其情取其怨則無不同也書曰匹夫匹婦不獲自盡民主周與成厥功恭惟國朝德化所及萬物咸遂高麗之人獨有何罪而受此苦焉昔東海有冤婦三年大旱今高麗有幾冤婦乎比年其國水旱烟仍民之飢孱者甚衆豈其怨歎能傷和氣乎今以堂堂天朝豈不足於後庭而必取之外國乎維承恩於朝夕猶懷父母鄉黨人之至情也而乃置之宮掖愆期虛老時或出之而歸之寺人終無孁者十之五六其怨氣傷和又何如也事有小弊而為國之利者客或有之然不若無弊之為愈也况無益於國家取怨於遠人其為弊不

小者哉伏望煥發德音敢有冒干內旨上瀆聖聽下為己利而取童女者及使於其國而取妻妾者明示條禁絕其後望以彰聖朝同仁之化以慰外國慕義之心消怨致和萬物育焉不勝幸甚帝納之本國除判典校寺事忠惠後二年奉表如元因留居凡六年元授中瑞司典簿時本國官爵猥濫奴隸亦得軒冕殿中崔江求為正尹穀聞之寄詩云不妨正尹生前得猶勝中書死後加安就趙溟死後皆拜中書故云忠穆襲位還國穀寓宰相書曰惟我三韓國之不國亦已久矣風俗敗壞刑政紊亂民不聊生如在塗炭幸今國王受命之國民之望之若大旱之望甘澍也

然國王以春秋之富謙恭冲默一國之政聽於諸公
則其社稷安危人民利病士君子之進退皆出於諸
公夫進君子則社稷安退君子則人民病此古今之
常理也然則用人又為政之本也蓋用人則易知人
則難不問邪正不論高下惟貨是視惟勢是依附戒
者雖姦諂而進之異己者雖廉謹而退之則其用人
不既易乎用人易故政曰亂政亂故國家隨以危亡
此不待遠求諸古實目前之明鑑也古之人知其然
於一進退人之際而必察其所行所從來惟恐黷於
貨而奪於勢也然猶朱紫相奪玉石相混其知人不
既難乎即今本國之俗以有財為有能有勢為有智

至以朝衣儒冠為倡優雜劇之戲直言正論為閭里
狂妄之談宜乎國之不國也穀之所以離親戚去鄉
國久客於輦轂之下者正為此耳比聞諸公所以輔
政更化者與前日甚不相遠名雖尚老而少者實主
其柄名雖尚廉而貪者實執其權既斥惡少而大者
不悛其惡既改舊臣而新者反附其舊知人不難用
人甚易似非國王委任之意朝廷聞之得無不可乎
或曰不必寓書諸公徒見其怒而無所益也穀應之
曰社稷苟安人民苟利將具本末言之朝廷達之天
子豈以諸公之怒而便令默耶是用敢貢狂瞽之說
惟諸公之垂察焉順帝幸上都穀扈從本國拜密直

副使累陞知司事進政堂文學封歸山君以頒朔還國與李齊賢等增修閱漬所撰編年綱目又修忠烈忠宣忠肅三朝實錄與陽川君許伯掌試取金仁瑄等毅伯徇私多取世家不學子弟憲司彈之不出新及第依牒後還於元中書差監倉本國拜都僉議贊成事尋還國忠定即位毅以嘗請立恭愍不自安游關東明年元殺奉議大夫征東行中書省左右司郎中又明年卒年五十四謚文孝性端嚴剛直人皆敬之所著稼亭集二十卷行于世子穡自有傳

禹倬

禹倬丹山人父天珪鄉貢進士倬登科初調寧海司

錄郡有妖神祠名八鈴民惑靈怪奉祀甚瀆倬至即碎之沉於海淫祀遂絕累陞監察糾正時忠宣蒸淑昌院妃倬白衣持斧荷藁席詣闕上疏敢諫近臣展疏不敢讀倬厲聲曰卿為近臣未能格非而逢惡至此卿知其罪而左右震慄王有慚色後退老禮安縣忠肅嘉其忠義再召不起倬通經史尤深於易學卜筮無不中程傳初來東方無能知者倬乃閉門月餘叅究乃解教授生徒理學始行官至成均祭酒致仕忠惠三年卒年八十一

安軸

宗源 輔

安軸字當之福州興寧縣人父碩以縣吏登第隱不

仕軸生而穎悟力學工文中第調全州司錄選補史
翰除司憲糾正忠肅十一年中元朝制科授遼陽路
蓋州判官時忠肅被留於元軸謂同志曰至憂臣辱
至奪臣死乃上書訟王無他王嘉之超授成均樂正
蓋州守遣人禮請王方嚮用故不能去累遷右司議
大夫忠惠即位命存撫江陵道有文集曰闕東瓦注
入判典校知典法事忠肅後位凡得幸忠惠者皆斥
之或以軸為所斥者親罷之既而起為典法判書忤
內豎用事者久罷忠惠後位又拜典法判書轉監察
大夫自樂正至監察大夫皆帶館職表箋詞命多出
其手以檢校評理出牧尚州時母在興寧軸往來以

盡孝忠穆立召為密直副使累陞僉議贊成事監春
秋館事與李齊賢等增修閔漬所撰編年綱目又修
忠烈忠宣忠肅三朝實錄執事者不喜儒罷封興寧
君已而後職四年疾作乞致仕後封興寧君卒年六
十二謚文貞處心公正持家勤儉嘗曰吾平生無可
稱四為士師凡之屈抑為奴者必理而良之碩早歿
軸教二弟輔輯俱登第輔輯事之亦如父子宗基宗
源

宗源字嗣清年十七登第忠穆時選補史翰秩滿當
遷同僚沈東老年高位下宗源讓之軸聞而喜曰讓
德之先也我讓於人人誰捨我我家有人殆益昌乎

後一年始調三司都事恭愍初授典法正郎時田民
刑訟皆聚典法裁決平允人稱其明累遷侍御史出
按揚廣道王避紅賊南幸宗源來謁於道先往忠州
備供御左右諧曰按廉到忠州已逾嶺而遁矣王信
之遣中使執以來使者至忠州見宗源在館辦供頓
執與俱來王知其誣釋不問王次陰竹吏民皆逃匿
以宗源不能供帳下巡軍貶知清風郡事後為典法
總郎辛肫擅權士大夫多趨附之有執政者言吾等
薦公於領相諫官可得宜速往謁宗源辭曰我本疎
懶趨勢非我所能也執政慚反諧之出為江陵府使
有惠政未久而代民立生祠以祀之閑居七八年屏

跡不出及此誅起為司憲侍史遷右司議大夫辛禍
即位與左司議柳珣門下舍人金濤起居舍人朴尚
真獻納林孝先正言盧嵩閔由誼上書都堂曰官者
為患趙高而下班班可見我忠宣王吐蕃之辱忠惠
王岳陽之禍皆由伯顏禿古思龍普之所為也至于
前日萬生大逆極矣今至上幼冲當親老成以養德
性不可復令官者朝夕狎昵壅蔽聰明以至誤國至
於魂殿既有都監教供朝夕不可復令官者紛然聚
會以基固寵之地伏惟諸相國為國深慮擇其忠謹
者十餘人以備宮內掃除之後其別賜及祿俸毋得
疊受以費國用其餘徒黨各令從便毋使復為國家

之惠時禍年幼政出宰相故宗源等獻書冀其處置
宰相不以為慮歷成均大司成右常侍進大司憲時
執義金永得等希池禽意誅誅林樸宗源畏其勢莫
敢言改判崇敬府事未幾封興寧君尋以門下評理
復兼大司憲賜純誠補祚功臣號與同僚上疏言自
古宦寺擅權必至誤國故我祖宗擇臣僚有德行者
給事左右宦官不過數人以脩宮闈洒掃未嘗授以
文武官爵先王即位之初亦遵古制其後宦寺夤緣
乘間用事廣樹朋黨卒有萬生之禍可勝嘆哉逮至
殿下李得芬但以先微代勞位至贊成招權納賄譖
毀朝臣中外臣庶莫不切齒幸賴睿斷遠竄于外然

其徒黨尚多濫受官爵虛費俸祿無補國家將來之
禍實為可慮請依祖宗舊制擇聰敏者不過十人以
脩宮內使令餘悉罷黜又與掌令呂克禔尹就持平
成石珣等上疏曰近來大明譴責我國每請謚承襲
不降德音以我國所不產金銀馬匹定為歲貢厥數
甚多雖抽斂文武官以至散官尚未克額貪利無識
者不顧大體利其販賣所持私物於進獻數十常八
九大明益不直我而輒拒使者不納今又遣使大明
安危係焉其私物宜差等定數數外雖一疋布不得
賣行擇遣清白有威望者於西京安州等處與都巡
問使搜檢如有私賣金銀馬匹及數外布疋者置之

極刑妻孥家產沒入官其知情不禁者削職又一行
有犯禁者使副亦皆科罪從之改封順興君加純誠
翊戴輔理功臣號又拜政堂文學崔瑩誅權臣貪污
者以宗源清謹擢門下贊成事提調銓選事辭不克
恭讓朝判三司事進封興寧府院君仕
本朝判門下府事卒年七十謚文簡性簡重風神清
朗勤謹安詳嘗作亭扁以雙清客至必置酒不務豐
侈惟以禮意款洽子仲溫景良景恭景儉
輔字負之年十九登第調慶州司錄選補春秋修撰
累陞編修官忠穆元年中元朝制科授遼陽行中書
省照磨兼承發架閣庫輔曰既受命不供職是不恭

也况照磨惟收掌文書無他務吾當赴省既上官省
官重其才皆禮貌之輔曰吾今足以塞吾責母老不
歸養非孝也于是棄官東歸後拜右代言兼執義忠
定時為典法判書恭愍立知其賢授密直提學兼監
察大夫提調銓選事一日夜將半王召輔入有所除
授既而曰今日何日命取曆觀之曰猖鬼也姑止輔
嘗惡陰陽拘忌則跪曰王者奉天時不在於此願殿
下欲行則行猖鬼何害王變色四年拜政堂文學輔
自謂遇知知無不言以而王以為濶於事情輔亦以
母老乞骸歸養為東京留守以近興寧也六年卒年
五十六謚文敬性剛直廉潔喜讀史漢為文章去華

取實達而已矣臨事務遵大體畧不依違顧望且不
事生產及攷家無儋石之儲無子

崔灑

崔灑字彥明父一字壽翁雞林人文昌侯致遠之後
父伯倫擢魁科官至民部議郎元授高麗王京儒學
教授灑幼穎悟九歲能詩既長學日進大為先輩所
服登第補成均學官學諭闕負灑與李守者爭政丞
崔有濟欲與守伯倫罵有濟語頗不遜配伯倫於孤
蘭島灑選藝文春秋檢閱以事貶長沙監務召授藝
文春秋館主簿忠肅八年應舉於元中制科授遼陽
路蓋州判官及東還藝文成均典校三館出迎於迎

賓館遷藝文應教赴始蓋州地僻職穴居五月移病
東歸累官至檢校成均大司成灑才奇志高讀書為
文辭不資師友超然自得不惑異端不溺習俗而務
合於古人至論異同苟知其正雖老師宿儒為時所
宗者且詰且折確持不變延祐科興聞詔乃曰可試
所學既而果中制科同年狀元宗本稱其才屢形於
詩自是名益著異己者益不喜而排之灑又不善伺
候放蕩取言片不大用然取友必端詩酒自娛嘗過
東萊縣登海雲臺見合浦萬戶張瑄題詩松樹曰噫
此樹有何厄遭此惡詩遂削去之塗以土行至安東
瑄聞之怒命猛將三四追之得廉從一人歸械立門

外灘潛踰竹嶺還京大為儒林所笑其恃才傲物類
此生平不理家人生產業自號拙翁後居城南獅子
山下自著猗山隱者傳曰隱者名夏屆或稱下逮蒼
槐其氏也世為龍伯國人本非覆姓至隱者因夷音
之緩併其名而易之隱者方孩提已似識天理及就
學不滯於一隅終得旨歸便無卒業其汎而不究也
稍壯慨然有志於功名而世莫之許也是其性不善
於伺候而好酒數爵而後喜說人善惡凡從耳而入
者口不解藏故不為人所愛重輒舉輒斥而去雖親
友惜其欲改或勸或責不能納中年頗自悔然人已
待以非可牢籠而未可用而隱者亦不復有意於斯

世矣嘗自言吾所嘗往來者皆善人而其所不與者
多欲得衆允難矣此其所短乃其所以為長也晚從
獅子岬寺僧借田而耕開園曰取足自號猗山農隱
其銘座右曰爾田爾園三寶重恩取足奚自慎勿可
緩隱者素不樂浮屠而卒為其佃戶蓋訟夙志之爽
以自戲耳忠惠後元年卒年五十四嘗選本國名賢
詩文題其目曰東人之文凡二十五卷所著拙藁二
卷行於世無子家又甚貧無以襄事朋友致賻乃克
葬

張沆

張沆史失世系為人廉正有文登第稍遭司憲糾正

官累左司議大夫忠肅見譖留元五年未歸沉奮義
忘身侍從有勞以功賜鈇券尋救羅州入為軍簿判
書忠惠時拜密直提學權授僉議叅理平壤尹封永
山君忠穆初除政堂文學每進對常以教寢園為戒
嘗致書都堂曰主上隆師向學樂聞善道而儉邪弄
權欺天罔上使刑政不平害及無辜致傷和氣天降
早災餓莩載路烏鳶犬豕之所爭食不可忍視若悉
掩埋且賑飢乏和氣可通豐稔可致也恭愍立以沈
遂禮樂命修正大廟禮樂器服及卒王曰今宰相寧
有盡心宗廟如張訥齋者乎謚文顯

李晟

李晟潭陽人弱冠登第調溫水監務移水原司錄秩
滿挈家歸竹溪村舍不求祿仕日以討墳典為事後
被薦補國子博士除閣門祗候年五十九拜左司補
入直西省作詩云藥砌清風欺我老竹溪明月誘吾
情昨宵已決歸田計雪盡江南匹馬行翌日棄官歸
田一時名儒會晟草堂設尊俎錢之忠宣在燕邸聞
其名起授內書舍人遷典儀副令藝文應教轉選部
議郎忠肅元年棄官南歸如民部典書致仕後為化
平府使未幾又辭卒年七十五無子為人質素無華
自幼力學卷不釋手所至學者如雲時人謂之五經
笥

趙廉

王伯

趙廉字魯直淳昌人忠肅朝登第又中元朝制科授
遼陽等路總管知府事為典理佐郎論昭穆之制語
在禮志忠惠初除正言與許邕鄭天濡等上書論崔
安道子璟借述登第韓宗愈取士不公王欲下廉等
獄發臣朴連進曰諫官不可罪乃^止後拜左司議大
夫時詔使入國証王以不迎詔鞠兩府甚急兩府皆
求廉與右司議王伯上疏言君臣一體禍福共之且
臣為君隱猶子為父今兩府私軀命遺君父罪請論
如法辭甚剴切王覽其疏義之與伯同拜密直副使
由司議入樞府前此所無有也忠惠後四年卒年五

十四嘗與中朝士大夫講明經史無不通伯初名汝
舟江陵人本姓金新羅太宗五世孫周元之後遠祖
又佐太祖有功官內史令太祖納其女為妃賜姓王
伯忠烈朝登第忠肅時以糾正叅銓注尋為左司補
發人李仁吉妾父西京郎將崔得和為隨州守伯與
若司補李菁等不署告身仁吉訴之杖伯等闕下流
海島忠惠後二年乞骸骨歸老全州忠定二年卒年
七十四無子伯與廉皆嘗與曹頤之亂語在頤傳

李伯謙


李伯謙平章事公升四世孫風儀端麗忠烈朝登第
調南京司錄累轉右正言知內旨出為公州副使勸

農桑民以富饒入為右司諫忠宣初授司憲執義陞
右代言知選部事藝文館司伯累轉家直副使選部
典書出牧濟海二州以最聞忠肅五年濟州賊魁使
用金成等嘯聚亮徒逐星主王子以叛欲討之而難
其人賊黨咸曰若得李伯謙宋英來撫吾豈敢叛乎
乃遣伯謙及咸招撫之未幾賊平其見愛畏如此八
年加同知密直司事卒五十八子資深

申君平

申君平平州人登第忠肅朝為臺官時賂權貴得官
者幾百餘有崔琬者嘗匿父喪赴舉後中第為水州
叅軍有穢聲為同榜所斥倚權豪為成均學錄君平

皆不署告身又不署政丞姜融贊成蔡河中懷義君
崔老星左代言曹莘卿元尹申時用持平賢告身以
故見忤罷朝野惜之翌日掌令朴元桂署之人譏其
怯恭愍元年授羅州牧使時母年九十嬰疾君平牢
辭不赴四年拜左代言王命罷義成倉官全以道禹
攸吉德全倉官崔云固申天命未幾攸吉拜典客寺
丞攸吉君平友婿也以道等頗有言君平惡之白王
收除目抹攸吉名後王欲授僧職召君平方直宿辭
以疾後拜御史大夫



卷之五